

## Il Vic ei in chezer filosof

**Pugns da vesta** — la novissima ovra-litterara da Vic Hendry

*Da Isidor Winzap*

**Il Calender Romontsch da 2003 cuntegn ina lavur voluminusa cul tetel «La Surselva all'entschatta dil tierz millenni» dil medem autur. Igl ei ina specia da mosaic ni panorama digl intschess dall'entira Surselva. Avon entginas jamnas hai jeu entschiet a leger il niev cudisch intitulaus «Pugns da vesta», in'ovra da 315 paginas, scretta ed edida da nies scribent tuatschin sesents a Schaffusa. Igl ei in cudisch en Prosa che cumpeggia 131 pugns da vesta (sche quella denominaziun ei la dretga), singuls tractats, posiziuns ni opiniuns. Jeu havess legiu bugen ina introducziun, in plaid sin via digl autur ni da zatgi auter. Pusseivel fuss ei era stau da scriver zatgei per concluder alla fin dil cudisch. Da tgei setracta ei en quella nova ovra litterara?**

### **Entgins schatgs dils tetels**

Cun grond interess hai jeu entschiet a leger ils 131 tetels dil cuntegn che cumpeglian quasi 4 paginas. Da quels dattan biars en egl per motivs ils pli differentes. Els ein per part originals e pli che originals pervia da certs plaids nunusitai, da formulaziuns specialas u quasi nuncapeivlas, ni da tematicas che attrain per in motiv ni l'auter l'attenziun:

- La femnella da bar
- Maria da Magdala
- Na, buca levar da mort en veta
- La domina herodiana
- Anti
- Igl autur sepanza
- Frehira
- Gnagn – puf
- Il scheni dil zerclen
- La buda tiella filistra
- Ed jeu stoi hotten
- Tschoss e blusas da seida
- Sbucauns e sbuccaunas
- Scampafora
- La lerma noscha
- In tgil cauld
- Il gasettist e gasettochel
- Empren d'emprender
- Lolitas
- Ina lavur da piertg
- Bulschadira
- Amuronza betta indentergliauter
- Il Luis snup
- Aschia sei egl uffiern
- Ils reps
- Cun 50 danvonz
- La hara digl emprem d'uost
- Apotecher – tiu etg fa miracles
- Il purtadi
- Has legiu quei cudisch?

Quei ei la davosa contribuziun el cudisch. Ed ella entscheiva sco suonda ed ei el medem temps in bien exempel per il stil hendryan e ses giugs da plaids:

Has legiu quei cudisch?

Quei ei pil solit ina tschécca damonda.

Buca denton senza ina resca.

Ti mettas enzatgi en perfetg.

E la persuna che ti mettas en perfetg – entscheiva a tschatscherlar ed ir en fanzegna; ti legias la tschatschra, ord ils eglis (314).

E con resta suenter la lectura?

Pil pli sai fetg pauc avon maun. Schizun sch'ins ha legiu il cudisch.

Sche daco pia?

Ina gronda part dallas lecturas e dils lecturs legian ils cudischs en la diagonala e suroravi. Entscheivan magari enamiez e sch'ei vegn propi adaquella – meinsvart davostier. Per endriescher silsuc, co l'entira historia finescha. Ed ozildi munglass ei dar el raquent in triep morts e surtut ina purziun scosauda sex, ed aunc ina ga sex (314).

Tonton pretenda il scribent:

La sentupada en in cudisch ei tuttina in dabien.

Mo Hendry conceda: «Ina pintga pintga quantad sefatschenta cun la lectura muort il lungatg sco tal. Ils maletgs ch'ins caveglia tscheu e leu per far entelgir e clarificar, ils ezs interesseschans pauchet. (315)

Mei ha il lungatg denton (adina) interessau fetg, gie quasi en emprema lingia. Perquei hai jeu fatg mias notizias d'uront la lectura, fatg segns, suttastriha e remarcau. Ed igl ei seresultau ina dètgà raccolta culs tetels: Garnins ed uettas, verdads e sentenzias, giugs da plaids, plaids rars ni sporadics, plaids cun ina steila (\*)= plaids vegls, antiquai ni ord moda, creaziuns hendryanas, plaids moderns, formulaziuns pridas dil niev vocabulari romontsch sursilvan-tudestg, stil, grammatica, plaids cun influenzas dil tudestg, plaids engles, persunalitads ed artists (filosofs, scribents, cumediants, teologs, picturs, politichers, schurnalists etc.).

Mo, tgei far alla finala cun quei material rimnau? La Quotidiana ei ualvess il dretg forum per publicar da quellas retschercas! Forsa igl Ischi, mo cura cumpara el puspei, cu ei ina nova ediziun programada e finanziabla? Ina pussevliadad fussen las Annalas. Mo damondas linguisticas ein buca quei che interessescha oz ina gronda part dils Romontschs, plitost damondas economicas, politicas, existenzialas e socialas ni dalla politica dil lungatg e cul lungatg. E cheu dat ei enconuschentamein ed ufficialmein mo ina unitad da ductrina. Auters meinis ein ni giavischai ni dumandai.

Lein denton revegnir a certs pugns da vesta ed a lur cuntregns».

### **Descripziuns gartegiadas**

Vic Hendry sa scriber e describer fetg bein, cunzun cura ch'ei setracta da situaziuns specificas, en las qualas carstgauns secattan. El senta e resenta bein il stadi dall'olma dalla singula persuna, ordadora ed endadens (En la caffetteria, Enzatgi peglia pil maun, Il tat va naven). Il lungatg ei cheu concis, cumpacts ed exacts.

### **Il Vic filosofescha dil bi e dil bein**

Tgi che enconuscha buca la veta, las ovras e la filosofia dils gronds filosofs romans, grecs e tudestgs, vegn denter auter confruntaus culs suandonts »nums: Seneca (Secuntegn el discletg), Socrates (Empren d'enconuscher tetez) «Socrates ei staus in emparader, muentond trasora damondas singularas» (148), Platon (che fuva influenzaus da Socrates), Epicur (Il curtgin digl Epicur). Lein dar in schatg: «Igl empi emprem numna Epicur ein amitgs. Amitgs ein indispensabels, sco per semeglia davos meisa, damai ch'ils commensals leventien la conlegria. Ins duessi mai magliar ina tschavera persuls. Gliez seigi sco da perver la biestga. Milsanavon suttastreha Epicur la libertad persunala e quella dil patratg.» (207). Lu ils renomai filosofs tudestgs, denter auter Friedrich Nietzsche (1844-1900) (Il scheni dil zerclem), in portret reussiu che cumpeggia excepziunalmein 8 paginas.

Dalla partida ei era Artur Schopenhauer (1788-1860) (Amuronzza betta indentergliauter). Avon che murir, igl onn 1860, sexprima Schopenhauer aunc ina ga e di: «Ch'ils viarms fetschien sco ei possien – mo il pir seigi, sch'ils professers maltarschinien sia filosofia.» (252).

Mo il filosof ch'ei tutpresents, en mintga tractat, en scadin pugn da vesta dil cudisch, ei Vic Hendry.

Buca ch'ins seigi senz'auter dapertut d'accord cun sia posiziun per part clara, per part lignusa e sibillinica (plein misteris). Mo il Vic ei in chezer filosof, denton tuttavia, buc in filosof dallas caglias! Ses pugns da vesta sebasan sin ina lunga experienza dalla veta, ella clamada da scolast e sco scribent. Ed en quei liung temps ha el fatg «ina gronda rauba», per duvrar ina da sias formulaziuns preferidas. Ed el ha «mess giu bia screts», denter auter suenter spassegiadas meditative en «quei ruaus en la Val dils Fraissens» (61), cu «la calira cua el vonn dalla Cletgovia, la tiara da tschep dil cantun Schaffusas»

(75) ni «mond pil lan» dalla Val Tujetsch entuorn. Il Vic ei bein cudischius cun la litteratura da differents lungatgs, la historia, la geografia, la historia naturala, la filosofia, la religion, igl art ed auter pli, insomma cun ils problems dil mund e siu tenti, quei grazia a sia lectura endinada, allas gasettas ed als mieds da massa en general. Mintgatun aulza el il det e dat in cussegl ni ina cunzina (a mi vegn endamen che beinenqual padrin ha vuliu dar buns cussegls a siu figliol, senza che quel hagi suandau els cun grond gust ni seigi staus zun obedeivels).

### **Verdads e sentenzias**

Da quellas ein sternidas dapertutanavon. Igl ei buca strufientschas, mobein sabientschas dalla veta ni filosofias. Lein piclar ora enqual uetta:

- Ils giuvens ein ils seismografs dils carschi (87).
- Tgi ch'ei sil sprun – sto ir vonzei ein brauncas (102).
- Leger ei ton sco mintga ga ina scoperta digl univers (116).
- S'entelli, leger endretg ei in cunst (116).
- Tgi che tscherca schneccas (tacs, taccas) – catta las schneccas (139).
- Enten la paupradad secatta sia rihezia (147),
- Dil reminent – citar ei bunamein adina in ughetg (157).
- Tgi che ha la cuida da veser – stuess mirar (172).
- Sche nus vein pertgirau ina caschada pors – s'udin nus ensemen (187).
- E quei ch'ins siara en la fossa dalla bucca, anfla il ruaus (203).
- Ils condaments selain buc urschegiar (strubegiar) (205).
- Il mal dalla nauschadad semantegn (206).
- Enconuschientschas sminueschan ils pregiudezis (207).
- Ed ins setegn adina plitost cun ils ezs da siu pèr (208).
- Las regurdientschas ein il soli pèl che vonza (215).
- Ils cavels ein la carta da legitimaziun (218)
- Ils fretgs semadiran ell'arsira dil sulegl, ed en l'aura da plievgia (248).

### **Il lungatg ed il stil**

«Prender il vocabulari sinta maun humiliescha. Ha denton in tschéc valzen», aschia scriva nies sribent alla pagina, 236. Cheu savess'ins entscheiver la discussiun e sedispitar. Quei dess denton in tractat per sesez. En mintga cass ha Vic Hendry consultau stediamein il niev vocabulari romontsch sursilvan-tudestg d'Alexi Decurtins. Ed el ha anflau bia, meinsvart da quei ch'ei pulitamein antiquau, mo sporadic ni schizun rarissim. Quei sa tgunsch e maneivel irritar ni bloccar enqual lectur ed impedir el da capir il messadi litterar.

Dil mument che las enconuschientschas linguisticas ein buca grondas e buca per tuts «ina scoperta digl univers». E per citar Vic Hendry e dar in exempel da siu lungatg e siu stil: «Jeu audel a plonscher; ils plaids fan mal.»

Sch'ins tila strufientschas strumpanadas agradora che sturneschan sco da sturnir cun la cugnada. In lungatg cut e putriu dad underdogs che va cul lungatg da scartira caporis.

Fai quen inaga.

Sch'il Romontsch daventa in lumper e siu lungatg lumpaverc dalla fuera cun fuffens e bulschas e scarps sil schanugl ch'ins pudess scarpar l'entira olma ord la beglia.

Mo teidli il lungatg o sin via ni zanza davos ina meisa ell'encarna. Mintg'auter in Giachen Putretsch u ina Baba Futida cun buas. Leu nua ch'ins fa giu ina pustracca mischedada cun tudestg ordinari ed empau zenslas englesas fallidas (86). Ferm tubac! Sco menziunau sura dess igl aspect dil lungatg e dil stil in capetel per sesez.

### **Dus cudischs en ediziun privata**

«Pugns da vesta» ed «Allegher e pietigot» (poesias) ein cumpari en ediziun privata da Vic Hendry, Schaffusa. El ei medemamein s'occupau (sco biaras gadas) persunalmein dalla vendita, cunzun ellas scolas. El ha discargau aschia la Romania dil squetsch finanziar e dalla resca dalla vendita. Tenor il motto: tgi che resca nuot, gudogna nuot!

Vic Hendry ei veramein in luvrer (el scrivesse luvrader) nunstunclenteivel sin camp litterar, era suenter ch'el ha, survegniu il premi grischun da cultura igl onn 2001: El mereta ina ga dapli laud e renconuschientscha.

*LQ 2003*